

**НЕДЕЛЯ ПЕРВАЯ СВЯТАГО ПОСТА,
в нюже православие воспоминается.**

На велицей вечерни, по предначинательном псалме стихословим Блажен муж: кафисму всю.

НА «ГОСПОДИ ВОЗЗВАХ»

Поставим стихов – 10. И поем стихиры на 6, воскресны – 3 и Анатолиевы – 3, Осмогласника.

Таже и Триоди 4 стихиры глас 6.

Подобен: Всю отложивше:

7. Стих: От стражи утренния до нощи, от стражи утренния, / да уповает Израїль на Гóспода.

Тя Непостижимаго, / прежде денницы безначально из Невещественнаго возсиявшаго, / безплотнаго же чрева Родителя, / пророцы, Господи, Твоим Духом вдохновени, / прорекоша отроча быти, / из Неискусобрачныя воплощаема, / человеком совокупляема, и сущими на земли зрима: / имиже яко Щедрый просвещения сподоби Твоего, // воспевающих неизреченное, и честное Твое воскресение.

8. Стих: Яко у Господа милость и многое у Него избавление / и Той избавит Израїля от всех беззаконий его.

Словом Тя проповедавшии / Богоглаголивии пророцы, / и дѣлы почѣтшии, / безконечную жизнь приплодиша; / твари бо, Владыко, паче Тебе Содетеля, / служити не претерпевше, / мира всего евангельски отвратишася, / и сообразни быша страсти Твоей, / юже провозвестиша; / ихже молитвами, сподоби / непорочно прейти воздержания поприще, // едине Многомилостиве.

9. Стих: Хвалите Господа вси языцы/ похвалите Его вси людие.

Естеством неописанный Божественным Твоим сый,/ на последняя Владыко воплощься,/ изволил еси описоватися:/ плоти бо приятием, и свойства вся сея взял еси./ Темже вид Твой образования описующии/ любезно целуем,/ к Твоей любви возвышаеми,/ и исцелений благодать почерпаем из него,// апостольским последующе божественным преданием.

10. Стих: Яко утвердися милость Его на нас/ и истина Господня пребывает во век.

Пречестное украшение Христова Церковь,/ честных прият и святых икон,/ Спаса Христа и Богоматере, и всех святых/ светлейшее возставление,/ имже просвещается,/ и красуется благодатию,/ и сонмище отлагает еретическое изгонящи;/ и радующися славит Человеколюбца Бога,// ея ради претерпевша страсти вольныя.

СЛАВА, ГЛАС 2:

Благодать возсия истины,/ прообразуемая древле сеновно,/ ныне явленно скончася:/ се бо Церковь воплощенным образом Христовым,/ яко прекрасною утварию облачится,/ скінии свидения образ пронаписующи,/ и православную веру содержащи;/ да Егоже почитаем,/ Сего и образ держаще, не прельщаемся./ Да облечутся в студ сице неверующии:/ нам бо слава зрак Воплотившагося/ благочестно покланяемый, не боготворимый./ Той облобызающе вернии возопийм:// Боже, спаси люди Твоя, и благослови достояние Твое.

И ныне, догматик гласа.

НА ЛИТИИ ЖЕ

яко обычно, стихира храма.

Слава, глас 2:

Радуйтесь, пророцы честнии,/ закон Господень добре учинившии,/ и верою явльшиися неборимии столпи неуклоннии;/ вы бо и ходатаи явистесья Новаго Завета Христова,/ и преставившесья на небеса./ Того молитесь, умирить мир,// и спасти души наша.

И ныне, Богородичен, глас тойже:

Все упование мое на Тя возлагаю,/ Мати Божия,// сохрани мя под кровом Твоим.

НА СТИХОВНЕ

Стихиры Осмогласника.

«Слава» - Триоди, глас 2:

Из нечестия во благочестие прешедше,/ и светом разума просветившесья,/ псаломски руками восплещим,/ благодарственно хвалу Богу приносяще:/ и на стенах, и дсках, и на священных сосудех,/ начертанным священным образом Христовым,/ и Пречистыя, и всех святых,/ честно поклонимся, отлагающе злочестную злославных веру:/ [честь бо образа, якоже глаголет Васильий,/ на первообразное переходит,]/ просяще молитвами Пречистыя Твоея Матере,/ Христе Боже наш, и всех святых,// даровати нам велию милость.

«И ныне» - Богородичен:

О, чудесе новаго всех древних чудес!/ кто бо позна Матерь без мужа рождшую,/ и на руку носящую, всю тварь содержащаго;/ Божие есть изволение, рождшееся./

Егоже яко младенца, Пречістая,/ Твоіма рукама носівшая,/ и Матерне дерзновение к нему имущая,/ не престай молящи о чтущих Тя, // ущедрити и спасти души наша.

По Трисвятом тропарь Богородице Дево: дважды.

И праздника, глас 2:

Пречістому образу Твоему поклоняемся, Благій,/ просяще прощения прегрешений наших, Христе Бóже:/ волею бо благоволил еси плотию взыти на крест,/ да избáвиши яже создал еси от работы вражия./ Тём благодарственно вопиём Ті:/ радости исполнил еси вся, Спáсе наш, // пришедый спасти мир.

НА УТРЕНИ, НА БОГ ГОСПОДЬ:

тропарь воскресен дважды.

Слава, праздника, глас 2:

Пречістому образу Твоему поклоняемся, Благій,/ просяще прощения прегрешений наших, Христе Бóже:/ волею бо благоволил еси плотию взыти на крест,/ да избáвиши яже создал еси от работы вражия./ Тём благодарственно вопиём Ті:/ радости исполнил еси вся, Спáсе наш, // пришедый спасти мир.

И ныне, Богородичен, глас тойже:

Вся паче смýсла,/ вся преславная Твоя, Богородице, таинства,/ чистотé запечатанной и девству храниму,/ Мати позналася еси нелóжна,/ Бóга рождши істиннаго:// Того моли спастися душáм нашим.

Каноны: Воскресный со ирмосом на 4, и Богородицы 4, от Осмогласника. И Триоди на 6. Катавасия Триоди, глас 4:

Песнь 1: Моря чермную пучину,/ невлажными стопами,/ древний пешествовав Израиль,/ крестообразными Моисеевыми руками// Амаликову силу в пустыни победил есть.

Песнь 3: Веселится о Тебе Церковь Твоя, Христе, зовущи:/ Ты моя крепость, Господи,// и прибежище, и утверждение.

Песнь 4: Вознесена Ты видевши Церковь на Кресте,/ Солнце Праведное,/ ста в чине своем,/ достойно зывающи:// слава силе Твоей, Господи.

Песнь 5: Ты, Господи мой Свет,/ в мир пришел еси,/ Свет Святой, обращающий из мрачна неведения// верою воспевающая Тя.

Песнь 6: Пожру Ти со гласом хваления, Господи,/ Церковь вопиет Тя,/ от бесовския крове очищися,/ ради милости от ребр Твоих// истекшею кровию.

Кондак, глас 2:

Неописанное Слово Отчее,/ из Тебе, Богородице, описася воплощаемь:/ и осквернившийся образ в древнее вообразив,/ Божественною добротою смеси./ Но исповедующе спасение,// делом и словом, сие воображаем.

Песнь 7: В печи авраамстии отроцы персидстей/ любовью благочестия паче,/ нежели пламенем опаляеми, зываху:// Благословен еси в храме славы Твоея, Господи.

Песнь 8: Руце распростер Даниил,/ львов зияния в рове затче;/ огненную же силу угасиша,/ добродетелию препоясавшися,/ благочестия рачители/ отроцы, зывающе:// благословите, вся дела Господня, Господа.

Песнь 9: Камень нерукосечный,/ от несекомыя горы Тебе, Дево,/ краеугольный отсечеса,/ Христос, совокупивый разстоящаяся естества.// Тем веселящися Тя, Богородице, величаем.

Таже: Свят Господь Бог: